

夢樓詩集

一
函
六
冊

夢樓詩集卷十七

丹徒王文治禹卿

楚遊草

庚子歲自杭州歸里多寄跡僧寺中未嘗遠遊三弟
文明以微官羈楚中未能卽歸余年將週甲矣昆弟
不相見者十餘載恐歲月因循不獲展友于之愛至
是溯長江省之此行千餘里居楚半載所遇故人不
少大畧多見於詩中得古今體詩四十七首

將之江夏途出懷甯訪姚姬傳民部快聚三日姬
傳有詩因次其韻

開帆便擬此維舟相見眞成兩白頭自爲年衰增眷戀却
因風逆得遲畱談空共證禪中地攬勝還登水上樓日暮

驪歌分手去明朝相憶隔江州

重泊琵琶亭

煙波隨意宿江關白傅當年淚久刪
贏得潯陽風水逆停舟三日看廬山

江州懷白樂天先生

有序

樂天賦琵琶行事昔人或謂當爲秀鐵面所訶似
不盡然樂天貶官經年殊未介意此因地之超也
及聞商婦琵琶始知遷謫之感此根本無明於茲
引動也淚濕青衫公然發露豈世諦中覆藏種性
所可同日語哉直心是菩薩道場有愛爲如來種
子大抵蘇白兩公於本分雖未必究竟了徹而文

字般若已通正恐隨波逐浪宗徒未易解此至於
呼伎開筵乃唐人風氣樂天旣非戒僧何必以此
責之抑樂天方遭貶斥此詩出竟無有媒孽其短
者則唐時風氣猶然近古也頃過琵琶亭慨然有
懷先生之爲人乃賦詩一章

送客潯陽月墮遲清秋一首白家詩荻花楓葉今千古紅
袖青衫彼一時往事儘教隨水去傷心偏愛倩人知不因
謫宦來湓浦如此江山缺好辭

黃梅望五祖山

黃梅傳道處千古一江清米熟尋篩過船開把柁行山舍
禪意淨雲抵世緣輕安得西廊下春梁畢此生

道士泚

少小聞圖經久聞道士泚昔年具歸舟匆匆未寓目頃作
武昌遊攜家溯寒綠出門陰雨多頗覺船居局皖江與潯
江守風踰信宿訪舊兼看山隨緣豈欲速竭來漸炎蒸三
朝武穴曲東風不與便未免額頻蹙薄暮忽開帆竟夜清
颼謾曉起推篷牕青翠映冠服東注千渦盤西塞一峯矗
亂流或安罾懸崖牢置屋此山有迴風過者慮顛覆舟人
戒檣艣余亦容爲肅那知恐懼中好景更連屬清暉變利
那靈臺難記錄却憶昔經過投閒返松菊如何遺此境汶
汶越林麓異味吐弗嘗異書皮弗讀因知思故鄉亦似耽
榮祿但教意有營便使心成欲餘年萬事灰尙有尋山福

所遇情斯欣吾生貴知足

西塞山

萬仞青山掛薜蘿一行白鷺剪煙波劉郎當日題詩處依舊蕭蕭蘆荻多

吹笛

吹笛扁舟楚水長碧天無際夜茫茫多情一片江南月直送行人到武昌

舍弟季明以微官滯楚中者十餘年今始省之
二首

八年風雨閉柴門千里拏舟訪在原謝草池塘縈舊夢廬樓明月復新痕

時陳望之開藩於此

白鷗沒海機心化黃鶴臨江仙

意存且倚閒雲吹玉笛人間得失謾須論

稚子歡迎僕候扉遠來風景似初歸徘徊城邑渾相識

廿余

年前過此問訊鄉人已半非客裏歲華尤易改少年豪宕肯全

違刀環勸汝須料理北固山前好夕暉

陳望之方伯夢禪圖

菩薩現宰官名儒耽禪悅此事有夙因難以文字說人生
若大夢順逆隨所設榮華但俄頃憂患亦漂瞥以此捨塵
勞坐禪斷生滅那知禪亦夢空華不可擬離妄孰爲真離
穢孰爲潔在夢而行禪仁者莫分別繫公本天人問學踵
先哲少年登文壇詞鋒紫電掣中年展經綸許身稷與契
風驚海不波月蝕光無缺涼溫備歷身甘苦潛入舌前塵

看已明結習悟方徹亦不辭崇高亦不染猥褻騎驢謾覓
驢出楔仍以楔諦觀夢禪圖請公牢記剗無夢亦無禪一
語衆流截

望之蒼茫獨立圖

世界不可盡古今不可窮風馳雲卷頃刻去我乃偶然寄
興於其中紛紅駭綠盡在吾目洪宮纖微盡在吾耳須彌
大海與微塵森羅盡在吾之身春何爲而嬌姹秋何爲而
零謝少何爲而昂藏老何爲而遷化公非詠杜老詩亦非
賦屈子辭本來不與萬法爲對待自覺之智誰能知蒼狗
浮雲儻故忽新碧浪長鯨倏險忽平子然一絲不掛體超
出日月揚光明吾觀此圖笑而復吁非公壁立萬仞之巨

力安得一條拄杖自倒自起而不倩人扶

潘瑤圃杏林春燕圖

雕梁無復舊巢泥
老去看花倦馬蹄
羨殺烏衣新羽翰
上林紅雨待雙棲

爲女孫玳梁題水仙畫幅

微雲冉冉疑無色
淡月濛濛似有香
更擬花前研曉露
臨風爲仿十三行

陳望之親家齋中盆蘭得同心並蒂二種命女孫玳梁爲之寫照綴以詩

蘭姿如佳人
蘭德乃君子
蓄德媿於蘭
異瑞斯鍾此
單拊發復萼
一心貫雙蘂
宛如兩高賢
握手談名理
又如兩傾

城綺閣偕臥起道侔志自合恩重肩恒比此方屈宋徒騷賦擅姝媿將母英與皇恂恍露仙軌芳意空盈盈無由溯江水女孫學畫蘭侵晨拭棐几命彼具丹黃圖之聊志喜

又絕句二首

自有微芳託素襟謾勞梔子結同心當年蘇小西陵渡可抵湘波一寸深

右同心

頻伽夙世演靈文幻作幽蘭倍覺芬似懺多生恩愛習雙雙低首向慈雲

右並蒂

題畫竹爲徐冠羣

濃綠生衣袂吟身萬竹中清音疑雜雨涼吹豈因風忽覺
白雲合不知溪路通依稀聞鶴警只在石橋東

雲對一

昨夜廻鸞下赤文上仙微意在畱雲雲歸有主難持贈莫
把慳心議隱君

陳研齋廉使以素冊索書余爲書數年來與雷雷
峯祝芷塘暨門人曹秋漁諸子唱和之作歸之蓋

研齋與諸君皆西湖文讌中人也頃研齋用余題

芷塘接葉亭圖五首韻見贈次韻奉答兼寄諸君

素卷難遮眼青霜久上顛偶攜京口酒來泛楚江天忽訝

交如舊兼逢眷是仙

雷峯次女妻兒試生而公與雷峯
有朱陳之誼諺所云四門親家也武

昌千載月仍挂庾樓前

博俸吳季子才壓蜀相如宦跡半天下朋簪敦古初筆花
江令退禮法步兵疎知己天涯在幽懷暫得於

當日西湖上文壇戰陣雄天花雨珠貝海蜃鬪青紅離合
無窮事升沉卅載中江皋弭節處六一已稱翁

漢廣敷佳政家家勒口碑題詩特餘事流韻滿江湄檠戟
秋霜肅門牆春柳隨相看真可羨全未白吟髭

東越兼西蜀通門與世姻雲山紛錯午出處各艱辛尙覺
歡如昨誰言迹已陳因公閒話舊翹首望關津

爲漢陽葉雲素題借書舫圖二首

水竹蕭蕭一畝居非舟非屋是吾廬
嬾奴祕笈探都遍却

向人間借異書

中年以往得朋難
漢上題襟雨未殘
半日與君論古昔
絕勝鄴架借書看

酬張慕青學使

流落江湖不計春
雲中忽遇薤珠人
莫辭更飲江南酒
多少秋懷欲共論

可韻上人彈琴

余素好音樂所見琴師多矣
上人疾徐清濁動中
古音賞會徘徊使人意遠
故每喜聽之

韻師抱綠綺爲我奏漁歌
漢上秋風至楚江
烟雨多指邊
滴清露弦外有滄波
便欲刺船去言尋張志和

爲紀緒承題天女散花圖

林間宴坐淡忘言風動袈裟一角翻欲舉維摩舊公案天
花開落已千番

陳伯恭侍講寄詩談禪次答二首

見性明心總浪傳文章烟月也關禪藏身人海原同俗行
腳天涯漫擬仙試問云何猶未在底須法爾說如然瀾翻
無盡千公案誰解飢餐與困眠

休誇教外有真傳一句彌陀卽是禪藥草予慙小莖者蓬
山君本大羅仙水分流處終歸海火到頭時急救然常凜
瞿曇遺囑語睡蛇未出莫安眠

祝芷塘見寄四庫館校書新作次韻奉懷二首

經卷蒲團尋活計綠蓑青笠認行藏消磨歲月甘聊略領
取山川却審詳漢上易彫惟柳色楚天難得是秋光夜來
黃鶴樓頭望心共江流萬里長

故人直閣有高吟寄我依然廿載心世態每於間處見交
情方信老來深連宵勝事惟孤賞何日醇醪與共斟風格
勸君聊自貶千尋柏樹莫森森

陽湖楊西河進士以詩見贈賦謝二章兼以畱別
毘陵多老宿師友卅年中籍甚楊夫子相逢鄂渚東論交
情最切談藝氣尤雄少日長安道清樽惜未同

新詩吟向我字字錦爲心謏學無能役相知有獨深江城
曾弄笛漢水舊橫琴明日飛鴻去誰聽空外音

伯牙琴臺

伯牙千載後猶自有琴臺秋水澹無際暮山相向來曰余
有古曲欲奏復徘徊但恐無鍾子素襟誰與開

仙棗亭

仙棗枯來似古楂廢闌荒砌臥煙霞只今黃鶴樓頭月曾
照當年一樹花

九日

一峯黃鵠映江青酒冽風乾菊正馨今歲茱萸人遍插客
中翻勝在家庭

遊武昌西山

朝發漢陽城暮抵三江口預計遊西山篷牕時探首晨暉

照我衣陟岸赴林藪初沿寒溪流宛轉似垂綬及登九曲
亭豁達啓重牖徐從蘿逕穿遂向僧扉叩三泉何渟泓愛
之坐來久凜疑毒龍蟄深恐潛蛟湫此間遊跡罕階下青
苔厚其上羅松篁日午色常黝傳聞吳大帝避暑此山阜
宮殿改精藍劍池沒荒莠浮雲千變迅託足一時偶所欣
名勝區暫得爲吾有三復子由文寄焉聊不朽

舟泊樊口

江山暎發見清空樊口烟霞此日逢赤壁深秋臨水月寒
溪半夜出林鐘舟因不繫隨來往雲爲能閒任淡濃曾是
坡公吟賞地褰裳異代許相從

甘興霸墓